



**Äntwert vun der Ministesch fir Ëmwelt, Klima an nohalteg Entwécklung op d'parlamentaresch Fro n°6939 vum 30. September 2022 vun der éierewäerten Deputéierten Madamm Martine Hansen iwwert "Chasse aux sangliers"**

**Wéi vill Wëllschwäin hätte missen laut den Ofschosspläng an de leschten 3 Juegdsaisonen geschoss ginn?**

An der leschter ofgeschlossener Juegdperiod (période cynégétique) (3 Joer: 1. Abrëll 2018 – 31. Mäerz 2021) hätte misse 17431 Wëllschwäi geschoss ginn.

**Wéi vill sinn der effektiv geschoss ginn?**

An der leschter ofgeschlossener Juegdperiod (3 Joer: 1. Abrëll 2018 – 31. Mäerz 2021) sinn 22647 Wëllschwäin als geschoss gemellt ginn.

**Gin d'Zuelen, déi an den Ofschosspläng fir de gesamten Wëldb Bestand festgeluecht goufen, generell erreecht?**

Ubäi den erfüllten Undeel vun den Ofschosspläng jee no Wëlldaart (offiziell Bezeichnung) landeswäit, baséiert op den Zuelen, ewéi se gemellt goufen.

Gibier	Pourcentage tiré par rapport au plan de tir imposé (2018-2021)
Cerf femelle	97%
Cerf jeune	117%
Cerf mâle	178%
Chevreuil	96%
Daim autre	74%
Daim mâle	98%
Mouflon autre	47%
Mouflon mâle	73%
Sanglier	130%

D'Ofschosspläng vun de Wëllschwäin, de jonke Routhirschen an de männleche Routhirschen goufen erfüllt. Déi vun de weibleche Routhirschen, de Réi an de männlechen Damhirschen goufe bal erfüllt. Bei den Ofschosspläng vun de weiblechen a jonken Damhirschen souwéi vun all de Muffelen hu méi Ofschëss gefeelt.

Bei den dräi Wëlldaarten, déi fir männlech Déieren (Trophäenträger) ee separaten Ofschossplang hunn (Routhirsch, Damhirsch a Muffel), ass den Ofschossplang wesentlech besser erfüllt ewéi bei de weiblechen Déiere respektiv bei der Kategorie weiblech a jonk. Dëst kéint dorop hiweisen, dass d'Juegd zu Lëtzebuerg nach deels trophäenorientéiert wier. Eng effizient Populationsregulatioun ass awer nëmme méiglech, wa staark an déi weiblech Bestänn agegraff gëtt.

**No wat fir Krittären ginn des Ofschosspläng opgestallt?**

D'Réglement iwwert den Ofschossplang gesäit folgendes a sengem Artikel 6 folgendes als Kritär vir:



« [...] L'élaboration des propositions de plans de tir se fait sur base de critères agricoles, viticoles, sylvicoles, cynégétiques et de protection de la nature et prend en considération en particulier la situation des dégâts à l'agriculture, à la viticulture, à la sylviculture, à la biodiversité et à la police sanitaire. Ces critères sont établis par l'administration et approuvés par le ministre, le Conseil supérieur de la chasse entendu en son avis. [...] »

Konkret ginn d'Ofschosszuelen aus de Jore virdu souwéi de Wëltschued mat an d'Basisberechnunge mat rageholl. Bei den Aarte Routhirsch, Dammhirsch a Muffel ginn och déi lokal Verbreedunge mat a Betruecht geholl.

D'Basisberechnunge ginn dann an de regionale Juegdkommissiounen opgrond vu lokalen Erfahrungswäerter ugepasst. Dës Kommissiounen setzen sech aus regionale Verrieder zesummen (1 Verrieder vun der Natur- an Bëschverwaltung, 1 Verrieder vun de Bëschbesëtzer, 2 Verrieder vun der Landwirtschaft an 3 Verrieder vun de Jeeër). D'Kommissiounen ënnerbreeden dann hier Proposen dem Ëmweltminister, deen se gegebenenfalls nach upasst, an dann arrêtiert.

### **Ass e genaue Monitoring geplangt, sou dat d'Ofschosspläng vum gesamten Wëltdbestand op Basis vun konkreten Zuelen kënnen ugepasst ginn?**

Den Artikel 9 vum groussherzogleche Reglement iwwert den Ofschossplang gesäit folgendes vir:

« Si au cours d'une période cynégétique la structure de la population du gibier ou de son habitat sur un lot de chasse subit des modifications importantes ou si des dégâts considérables aux cultures agricoles ou sylvicoles sont constatés, le locataire de chasse ou le syndicat de chasse peuvent introduire auprès du ministre une demande en révision du plan de tir arrêté initialement. Cette demande doit être motivée sous peine d'irrecevabilité. »

Op Demande vum Juegdpiechter oder dem Juegdsyndikat kënnen also d'Ofschosspläng ugepasst ginn, sollt et zu gréissere Changementer an der Wëltdpopulatioun oder dem Wëltschued kommen.

### **Wat fir Mesuren si geplangt, fir de Wëltdbestand generell, virun allem awer deen vun de Wëltschwäin ze reduzéieren?**

D'Hauptinstrument bei der Regulatioun vun de Populatiounen ass d'Juegd via d'Anhalen an d'Upasse vun den Ofschosspläng.

Am Kontext vun der Wëltschwäinproblematik gouf, fir zousätzlech Mesuren ze identifizéieren, e Groupe de pilotage „sanglier“ an d'Liewe geruff, den als Missioun d'Ausschaffe vun engem Wëltschwäinmanagementplang huet. Dës Grupp setzt sech zesummen aus Verrieder vun de relevante staatlechen Instanzen (MECDD, MAVDR, ANF, ALVA, MNHNL) wéi och vun de privaten Interessensgruppen (Naturschutz, Déiereschutz, Landwirtschaft, Privatbësch, Juegd, etc.).

### **Wéi steet d'Regierung zu enger Verlängerung vun de Juegdzäiten ëm eng Stonn moies an owes an zum Asaz vun modernen techneschen Hëllefsmëttelen, wéi beispillsweis Nuechtsichtgeräter?**

Den Asaz vun Nachtziel-Techniken ass well virun enger Zäit proposéiert ginn. D'Ëmsetzung vun dësem Projet ass och um Instanzewee, muss awer nach um Niveau vun der BeNeLux-Konventioun approuvéiert ginn.



LE GOUVERNEMENT  
DU GRAND-DUCHÉ DE LUXEMBOURG  
Ministère de l'Environnement, du Climat  
et du Développement durable

Ob d'Juegdzäite misste geännert ginn (wat och eng Ännerung vum Juegdgesetz géif beinhalten), wäert mat grousser Warscheinlechkeet am Groupe de pilotage „sanglier“ als potentielle Léisungsusaz am Kader vum Wëllschwäinmanagementplang diskutéiert ginn.

Lëtzebuerg, den 8. November 2022  
(s.) Joëlle Welfring  
Ministesch fir Ëmwelt, Klima an nohalteg Entwécklung